

Landsnet hf.
Gylfaflöt 9
112 Reykjavík

Reykjavík, 31. janúar 2025

Efni: Umsögn Orku náttúrunnar um uppfærðan netmála B3

Hér á eftir er að finna umsögn Orku náttúrunnar (ON) við uppfærðan netmála B3 Skilmálar um öflun reglunarafls og uppgjör jöfnunarorku. ON þakkar Landsnet fyrir tækifæri að koma sínum sjónarmiðum á framfæri en gagnrýnir þó stuttan frest sem fyrirtækið fékk og kallar eftir því að veittur verið a.m.k. 2 vikna frestur í framtíðinni til samræmis við þann lágmarksfrest sem veittur eru í samráðsgátt stjórnvalda. Áskilur ON því sér rétt til að koma frekari ábendingum og eða athugasemdum að eftir því sem ástæða þykir til.

Athugasemdir við uppfærðan netmála B3:

- Talað er um „næstadagsmarkað“ í uppfærðum netmála en hvergi er hugtakið skilgreint, hvorki í grein 2 í netmálanum né heldur í raforkulögum. Benda má á að í 18. gr. a. raforkulaga kemur fram að leyfi séu veitt fyrir rekstur raforkumarkaðar.
 - Með hliðsjón af framangreindu leggur ON til að hugtakið verði uppfært og að í stað „næstadagsmarkaður“ verði notast við hugtakið „raforkumarkaður“.
- Í grein 3.3 kemur fram að jöfnunarábyrgur aðili „skuli hafa leyfi ráðherra til að stunda raforkuviðskipti“. Samkvæmt raforkulögum er það hins vegar Raforkueftirlitið sem veitir slíkt leyfi.
 - Tillaga ON er að uppfæra þetta orðalag til að gæta samræmis við raforkulög, enda er það gert á mörgum öðrum stöðum í nýju drögunum.
- Í grein 4.2 er talað um að sölufyrirtæki „verði að tryggja að þeir notendur sem eru reiðubúnir til þátttöku á reglunaraflsmarkaði hafi fjarstýranlega notkun frá Landsneti“.
 - ON telur eðlilegra að hér sé talað um jöfnunarábyrgan aðila en ekki sölufyrirtæki. Sé notandi jöfnunarábyrgur getur ekki talist eðlilegt að sölufyrirtæki beri skylda að tryggja slíkt.
- Í grein 7.3. þurfa skil rekstraraðila næstadagsmarkaðar að vera á hverjum degi fyrir klukkan 13:00 á áætlunum sem gilda fyrir næsta dag á eftir.
 - Hér telur ON að Landsnet sé að setja óþarfa hömlur á rekstraraðila og mögulega nýja rekstraraðila næstadagsmarkaðar. Eðlilegast væri að skil yrðu að berast a.m.k. 2 klst. fyrir þann tíma sem þau eiga við sem er í samræmi við heimilaðar leiðréttingar á jöfnunaráætlunum Landsnets sem er ofar í grein 7.3. Slík útfærsla tryggir líka að allar gerðir raforkumarkaða gætu nýtt sér þessa grein og er þar með búið að renna stöðum undir innandagsmarkað.
 - Óþarfi er að taka fram að skila eigi slíkri áætlun á „hverjum degi“. Kjósi aðili að skila áætlun með lengri fyrirvara ætti það að vera honum heimilt og ætti ekki að

krefja hann um að gera slíkt á hverjum degi enda uppfylli hann kröfu um að skila áætlun a.m.k. 2 klst. áður en áætlun tekur gildi.

- Grein 7.6 er ný og talar um að ef jöfnunaráætlanir jöfnunarábyrgðaraðila og næstadagsmarkaðar beri ekki saman, skuli jöfnunaráætlun næstadagsmarkaðar gilda. Ekki getur talist eðlilegt að einskorða slíkt ákvæði við næstadagsmarkað, betra væri að hér væri talað almennt um raforkumarkað þar sem raforkumarkaðurinn skilar inn jöfnunaráætlun. Sé ákvæðið einskorðað við næstadagsmarkað má ætla að viðbótinni sé ætlað að gefa Elmu, dótturfélagi Landsnets, forskot á aðra aðila sem ef til vill myndu vilja nýta sér sambærileg ákvæði á mörkuðum sem ekki eru næstadagsmarkaðir.
 - ON leggur því til að orðalaginu í grein 7.6 verði breytt.
- Grein 7.6. veitir næstadagsmarkaði heimild til að leggja fram gildandi jöfnunaráætlanir þó svo að slíkir markaðir bera ekki jöfnunarábyrgð gagnvart notendum raforkumarkaðarins. ON vill undirstrika þá miklu ábyrgð sem raforkumarkaðir bera undir slíku fyrirkomulagi og mikilvægt er að gert sé grein fyrir mögulegum afleiðingum fyrir framleiðendur og notendur ef frávik koma upp í jöfnunaráætlunum raforkumarkaðar.
 - ON telur eðlilegast væri að aðili með slíka ábyrgð sé jöfnunarábyrgur og taki þannig ábyrgð á fráviki sem hann gæti valdið.

Að framan er að finna umsögn Orku náttúrunnar við uppfærðan netmála B3. Eins og fram kemur að framan telur ON að netmálinn þarfnist frekari endurskoðunar sbr. þær tillögur sem félagið gerir. ON er reiðubúið að gera Landsneti frekari grein fyrir þeim ábendingum sem settar eru hér fram og veitir undirritaður að öðru leyti fúslega allar nánari upplýsingar.

Virðingarfyllst,



Hjálmar Helgi Rögnvaldsson
Forstöðumaður Viðskiptaþróunar & Orkumiðlunar